

NAAN AN H.E PRESIDENT LITOKWA TOMEING
 Kwajalein Day 2009
 February 9, 2009
 Kwajalein Atoll

Yokwe kom woj aolep. Rainin joj obrak kin jitoben kamolol non Anij Jemed Ilan kin an kejbarok kij kajojo im Republic in an Marshall Islands.

Ij kile im kautiej Iroj im Leroij ro adwoj ibelakin Ailin Kein, kile yuk Mr. Speaker, im Iroj Chairman eo an Mon-Iroj, ri-kaki ro jemed ilo Eklesia ko, Minister im Senator rein motta, Ambassador Bishop, Ambassador Linghu, Colonel Clark, kom woj aolep kom ar koba tok ilo ien in, im elaptata aolep armij in Majol.

Kamolol non Iroj ro 4 an Kwajalein in im armij rein droer, ekoba Mayor Lemari im Kien eo an ailin in, kin kir eo ami non ad-woj kobatok im kemem-e rainin elap an Kwajalein. Rainin eaurok kin elon uun ko: Juon iaier, jej koba ibben dron im reiliklok im emloke-tok ta ko rar walok ioon ailin in ami ilo ran ko remotlok, ruo, non ad bwebwenato ibben dron kin kotobar im ettonak ko ad non ilju im jeklaj eo an ailin in ad.

Ilo mol, armij in Kwajalein re-bunbun im emejaja ibelakin Ailin Kein kin aer beran im aer maron jutak kin jimwe im maron ko aer.

Mekarta, elon aban ko kom kar iooni itok wot jen an kar jutak jikin tarinae in an America ioon ailin in ami, im einwot ami kar emakit jen ijoko jikimi, emakit jen jikin mona ko ami, im men kein aolep rekar maron ukot wewein mour ko ami, mekarta, kom ar bed im mour wot ibben dron ilo kajur im kin jitoben boro wot juon.

Jet wot yio elikin an jemlok bata eo ioon ailin in ami, kom ar kariweneneik tok armij ro nukumi, jeimi, jatimi, im jerami rar emakit im tok jen Bikini, Ronglab, Enewetak, im rar koontok lamoren in ami jen wot kokemelmel ko an America kin kein tarinae ko air rekajur.

Maantak non tore in, kom armij in Kwajalein komij jokwe im mour ebaak-e dron. Ijelokin, emoj ami kariweneneik tok ebar lon taujin ri-majol ro jen turtur'n Ailin Kein non bukot aer jeramon jen jermal ko ilo USAKA. Ikonan jiron kom armij in Kwajalein ke armij in Majol im Kien in adwoj ioleb kimij jimor kamolol kom jen ijo emwilal-tata ilo buruom kin ami joij im jela nae armij rein woj mottami.

Bar juon alen, jej koba tok ijin non kemem-e rainin elap an Kwajalein, juon ran eo ear jino ukot wewein mour ko ami im jemaron ba ke oktak in ear jino bedbed eo ebin im kajur ilo jemjera eo ad ibben lal eo jerad im mottad, America.

Einwot ilo imenene in mour kein ad, inne ej einwot juon bunten ne maanlok non juon ilju im jeklaj eo emon, einwot ad jab maron bar kemour juon bwebwenato eo emwotlok ak ukot menko rar walok moktalok, mekarta, raurok non bwebwenato in mour kein ad.

Jemaron jino juon jinok kaal im kalek juon ilju im jeklaj eo e-jeramonlok non aolep. Ej ijo kunar in non ajiri rein nejid, rein jibwid im ebeben ko ad tokelik. Im ien eo ejejet lok non jinoe ej kio.

Ejelok kajitok ke ebeben ko ad tokelik renaj konan loe juon Kwajalein eo ebolemen im emontata jikuul ko ie; juon Kwajalein eo emontata dren im jarom ko ie; juon Kwajalein eo elap an jerammon im wemourur jermal in business ko ie.

Aolep renaj bar einwot konan loe jet jermal in ekal ko remon non kakmanmanlok imon jokwe ko an aolep; ial ko re-meram im aibojwoj-lok im rej kobaik aolepen ailin in; juon oob eo ebareinwot emon im aibojwoj im enaj maron kamonoik ri-lotok ro ad.

Enaj wor jikin ikkure ko rebolomeir non jodrikdrik ro nejid non aer kalaplok kapel in ikkure im aitwerok ko ikotair non dron. Ilo turilik in ailin in, ej aikuij in laplok jukjuk in bed ko ie, wonmanlok ko non Enebwaj im Enelap Kan bwe en jokun wot juon wonmanlok ko ie im einwot ko jet iloan ailin in.

Elikin ami kar mour im entan iumin enanin 60 jima yio ko, tomak eo ao ebin in ej bwe ekkar im jejet bwe kom armij in Kwajalein komin tobar aolep menin jeramon kein. Im ilo torren enaj jejet kitien men kein aolep ne Anij ekonon, ej baj naj emon ad ron ainikien ad make eton drikdrik im bwebwenato ibben dron ilo jitoben monono im lanlon.

Kin tomak in, ij kio jakemanwoj non ami lale im lomnak kake juon monakjen in jermal eo non ad emakit maanlok ibben dron im kalek ailin in ad. Jej aikuij'n ukot lok wewein ad jermal rainin jen kilen jermal ko moktalok.

Jej aikuiji kilen jermal ko remonlok im kolmenlokjen ko rokaal-lok an ran kein. Melelein bwe jej aikuiji juon ijino ekaal im emonlok non ailin in ad.

Jej aikuiji Kien eo an America bwe en koba tok ibbed ilo emakit in ad einwot juon eo jerar im mottad. Kien eo ami ioleb ebojak in komane ijoko kunan im jutak ibben armij in Kwajalein.

Elon melele ko rej kwalok ke kotobar ko an American ilo Kwajalein ej ikijien jermal in tarinae wot, im bwe money eo dreo America ej letok non jiban Kwajalein ej bed ilo Compact eo.

Ij tomak ke elane jej mool ilo ad jermal im rarik dron non kakmanmanlok katan kein ad non dron, innem, jen oktak lok im kajej tokjen aban drikdrik ko rej iten ke-jebel-lok kij jen dron.

Kinke ilo torear jermal in ekaal an President Obama, emoj an Secretary Clinton kojella ke defense, diplomacy, im development rej joor ko jilu rej jurok foreign policy eo ekaal an America. Jej kamolol im kariweneneik tok melele kein remon.

Ilo December 16 in yio eo lok, ekar itok naan non Kien in ami iolep bwe 22 million jima dala eo ilo escrow account eo ejjamin jeblak non Treasury eo an America.

Uun eo ej kinke Kien in ami ej wonmanlok wot im jermal ibben landowner rein an Kwajalein non kajion kadredreiklok juon LUA kaal eo enaj emon non aolep. Ij kamolol America kin lomnak in aer emon.

Eddo eo an Kien in ami iolep ej non an jermal ibben armij in Kwajalein kab America jimor ilo jitoben kautiej im jela nae dron non kajion kadredreiklok juon LUA kaal.

Juon LUA eo enaj emon non America, juon LUA eo enaj emon non armij in Kwajalein, im juon LUA eo enaj emon non aolep armij in Majol.

Imonono in kwalok ke elon alen ad kenono ibben landowner rein im ej alikar ke ewor juon lomnak ekajur non iuun jermal in maanlok.

Ij bok ien in emon non ao bar juon alen kamolol ri-tel rein an Kwajalein im non kile im kautiej rutiej rein mottad jen lal ko ilikin im rekar kobatok ibbed ilo rainin.

Ilo ad wonmanlok jen ijin, enaj wor kabanban ko jenaj iooni, ijoke jen jab ebwer. Ak jen jermal ibben dron kin jitoben boro kuk im mejatoto in rejetak dron.

Im ijela, elane enaj eindrein, innem jenaj tobar aolep mejen-kajjik kein ad ilo ad borokuk im kamolol dron, elaptata E eo ej unjen menotemjej.

Menin wot, komoltata.